



Stručna služba općinskog vijeća i općinskog načelnika

Broj: 01/1-02-1305/19  
Ilijaš, 28.06.2019. godine

PRIJEDLOG

**Z A P I S N I K**

sa 32. (tridesetdruge) sjednice Općinskog vijeća Ilijaš, održane dana 28.06.2019. godine, sa početkom u 10:00h.

Tridesetdrugom sjednicom Općinskog vijeća Ilijaš predsjedavala je predsjedavajuća Općinskog vijeća Ilijaš g-đa Alma Omerović.

Prisutni vijećnici:

RB.	IME I PREZIME
	SDA
1	ŠEHERZADA ĆOSIĆ
2	ANEL BUMBULOVIĆ
3	VEHID HALILOVIĆ
4	ALMA OMEROVIĆ
5	MEHMED SINANOVIĆ
6	ADEM ALIĆ
7	FAHIR HASANOVIĆ
8	MIRZA BEKTIĆ
9	SEMIR DEDIĆ
10	HALID DIZDAREVIĆ
11	RASIM ŠEHIĆ
12	MELISA MATORUGA
13	ALEN HASKOVIĆ
14	SEAD ŠEHIĆ
	SDP
15	-
16	ELDAR ŠEHIĆ
17	MIRSAD OSMANOVIĆ
	SBB-FAHRUDIN RADONČIĆ
18	AKIF BEŠLIJA
	BPS-SEFER HALILOVIĆ
19	MUHAMED HANDŽIĆ
20	ALMIR ŠPIODIĆ
	GS
21	EDHEM HASANOVIĆ
22	ASIM MUJIĆ
	SAMOSTALNI VIJEĆNICI
23	-
24	BESIM GLJIVA
	LDS
25	MEHO DŽINDO

Odsutni vijećnici:

1. Alan Šerak i
2. Semir Dizdarević

Prisutni gosti:

1. TV Vogošća
2. Radio Ilijaš – Nermina Durić-Kahvedžić
3. Mahir Gljiva – predsjednik Savjeta MZ Gajevi
4. Mehmed Smajlović – predsjednik savjeta MZ Mrakovo
5. Meho Gljiva – Služba za društvene djelatnosti i poslove mjesnih zajednica
6. Volonter: Ehlimana Fazlić

Ostali prisutni:

1. Akif Fazlić – općinski načelnik
2. Sadeta Brkić – pomoćnik načelnika
3. Nijaz Spahić – pomoćnik načelnika
4. Zdravko Barić – pomoćnik načelnika
5. Sanja Zagorac-Jozić – pomoćnik načelnika
6. Ilda Kahriman – sekretar OV-a Ilijaš
7. Nedžad Masnopita – šef odsjeka za budžet i trezor
8. Adha Masnopita – stručni savjetnik za stambeno-komunalne poslove
9. Velid Fazlić – predsjednik Općinske izborne komisije Ilijaš
10. Maida Habibović – zapisničar.

ALMA OMEROVIĆ – predsjedavajuća

Otvorila 32. sjednicu Općinskog vijeća i prije utvrđivanja dnevnog reda, pozvala je predsjednika Općinske izborne komisije Ilijaš Velida Fazlića da uruči Certificate novoizabranim predsjednicima i članovima Savjeta mjesnih zajednica na području općine Ilijaš.

VELID FAZLIĆ – predsjednik Općinske izborne komisije

Na osnovu član 14. Odluke o uslovima i raspisivanju izbora danas ćemo dodijeliti Certificate novoizabranim predsjednicima i članovima Savjeta mjesnih zajednica. Dodjelu ćemo vršiti u skladu sa Odlukom, tj. redoslijedom kakav je Odluci. Zatim je izvršena dodjela Certificate.

Nakon podjele Certificate, zamjenik predsjedavajućeg OV-a Alen Hasković je konstatovao da su prisutna 23 vijećnika, te da postoji kvorum za odlučivanje.

Zatim je dao na razmatranje zapisnik sa 31. sjednice OV-a.

Primjedbi na zapisnik nije bilo, pa je OV-e jednoglasno usvojilo zapisnik sa 31. sjednice OV-a.

Pročitao je predloženi dnevni red i dao na razmatranje.

AKIF FAZLIĆ – općinski načelnik

Kao predlagač, sa dnevnog reda povlačim tačku pod brojem 7. Prijedlog Zaključka o povjeravanju na upravljanje i održavanje zemljišta za potrebe mezarja/groblja u Starom

Ilijašu i tačku 8. Prijedlog Zaključka o povjeravanju na upravljanje i održavanje zemljišta za potrebe mezarja/groblja u Ljubničima povlačim s dnevnog reda shodno mišljenju Komisije za statut i propise da se zatraži mišljenje Pravobranilaštva Kantona Sarajevo. U narednom periodu ćemo zajedno sa Pravobranilaštvom izdefinisati kako možemo na najbolji i regularan način urediti ove Zaključke.

Osim toga, predlažem OV-u da tačku 1. Vijećnička pitanja inicijative razmatra pod tačkom 6. obzirom da ja imam jedan veoma važan sastanak u 11:00h, a naravno da ću na isti kasniti jer želim da budem ovdje kada je u pitanju tačka Prijedlog Odluke o davanju prethodne saglasnosti za dodjelu koncesije privrednom subjektu JP Elektroprivreda BiH d.d. Sarajevo – Zavisno društvo Rudnik mrkog uglja "Breza" d.o.o. Breza za istraživanje i eksploataciju sirovine uglja na području općine Ilijaš.

MIRSAD OSMANOVIĆ – vijećnik SDP-a

Predlažem načelniku da tačku 6.a), c) i d) skine sa dnevnog reda da još jedanput sa nadležnim Službama razmotri način kupovine garaža koje se nalaza iza Osnovne škole "Hašim Spahić".

Obrazloženje: Neshvatljivo je da jedan broj ljudi može otkupiti garažu, a osoba, konkretno Himzo Hodžić koji je prije 40 godina kupio garažu, 40 godina je koristi i to pravo se njemu i još dvojici ljudi ovim Rješenjima uskraćuje. Ovdje samo mogu biti dvije stvari, a to je čista diskriminacija i druga stvar je da ovi ljudi koji su otkupili garaže nisu otkupili te garaže u skladu sa Zakonom. Zato još jednom molim i apelujem na načelnika da se ova tri Rješenja povuku sa dnevnog reda i da se još jednom razmotri način kupovine ovih garaža.

Što se tiče Rješenja pod b) – šta se to novo desilo u ovom Rješenju, prošli put je načelnik povukao ovo Rješenje? Odakle termin "vikendica" u gradskoj zoni?

ALMIR ŠPIODIĆ – vijećnik BPS-Sefer Halilović

Predlažem da se tačka 4. povuče sa dnevnog reda. Već smo jednom u materijalima dobijali ovakvu Odluku samo što je tada obuhvatala malo više parcela. Mislim da treba, prije svega, uraditi uvid, napraviti javnu raspravu ili informisati građane, odnosno ljude čije parcele obuhvata ova koncesija koju mi dajemo. Mislim da se mi, prije svega, trebamo staviti u ulogu da zaštitimo građane općine Ilijaš, nego da činimo uslugu nekim javnim preduzećima.

Što se tiče povlačenja tačaka sa dnevnog reda, molim vas, kada planirate dnevni red i napravite dnevni red i dostavite nam u materijalu, ima nas koji se pripremamo za sjednice Vijeća i potrošimo dosta vremena da bi pročitali, istražili da bi mogli ispravno postupiti na Vijeću i dođemo na Vijeće i onda se te tačke dnevnog reda povuku. Molim vas samo da budete malo precizniji u narednom periodu, da poštujete i naše vrijeme dok se pripremamo za sjednice Vijeća. Što se tiče ovih tačaka koje je načelnik povukao, slažem se da ovo treba podhitno rješavati, jer ovo je zaista problem i mi se ljudi "na crno" kopamo u Ilijašu (Ljubnići, Stari Ilijaš), a ne znam kakav je status sa ostalim mezarjima. Kopamo se "na crno" i sve je dobro dok ne bude neki problem.

Molim vas samo da ubrzate rješavanje ovih pitanja i tražim, kako sam već rekao, da se sa dnevnog reda povuče tačka 4. Prijedlog Odluke o davanju prethodne saglasnosti za dodjelu koncesije privrednom subjektu JP Elektroprivreda BiH d.d. Sarajevo – Zavisno društvo Rudnik mrkog uglja "Breza" d.o.o. Breza za istraživanje i eksploataciju mineralne sirovine uglja na području općine Ilijaš.

ALEN HASKOVIĆ – zamjenik predsjedavajućeg

Ja se ne bih složio da se samo neke kolege spremaju za sjednice Vijeća. Cijenim da se sve kolege spremaju za sjednice Vijeća, a Poslovnik omogućava predlagачu da povuče tačku dnevnog reda sve do izglasavanja dnevnog reda.

AKIF FAZLIĆ – općinski načelnik

Tačku 4. Prijedlog Odluke o davanju prethodne saglasnosti za dodjelu koncesije privrednom subjektu JP Elektroprivreda BiH d.d. Sarajevo – Zavisno društvo Rudnik mrkog uglja "Breza" d.o.o. Breza za istraživanje i eksploataciju mineralne sirovine uglja na području općine Ilijaš, kao predlagач, ne želim je povući sa dnevnog reda, a obrazložiti ću kada dođe na dnevni red, sve argumente zbog čega mislim da je ovaj prijedlog Odluke jako dobar i da na određeni način znatno poboljšava situaciju i poziciju naših građana nego što je kao trenutno stanje.

Kada je u pitanju tačka 6. ovo što je Mirsad rekao, dakle, ja sam to isto rekao svojim službama, razmatrao na nekoliko sastanaka s njima ovu situaciju, probao naći rješenja za ova tri lica koja se tretiraju ovim Rješenjima, u smislu da su ona negativna i mi nismo mogli naći zakonski osnov da ona budu pozitivna. Ovim Rješenjem oni dobivaju pravo da povedu postupak, da se zaštite putem pravnih lijekova, ali također doći će se u poziciju kroz donošenje današnjih Rješenja da ljudi možda preispituju kako su neka ranije donesena, jesu li regularna, zakonita i to je neki put koji će na kraju krajeva dovesti do stvarnog stanja. Tako da i uz moju želju da ovi ljudi dobiju priliku da riješe ovo pitanje, zaista nismo mogli naći zakonski osnov ga da riješe i zbog toga nema razloga da povlačim ovu tačku dnevnog reda.

ALEN HASKOVIĆ – zamjenik predsjedavajućeg

Obzirom da diskutanata po dnevnom redu više nije bilo, Općinsko vijeće je većinom glasova usvojilo slijedeći

#### DNEVNI RED

1. Izvještaj o realizaciji zaključaka sa 31. sjednice
2. Prijedlog Odluke o visini naknade za rad članova Savjeta mjesnih zajednica Općine Ilijaš
3. Prijedlog Odluke o davanju prethodne saglasnosti za dodjelu koncesije privrednom subjektu JP Elektroprivreda BiH d.d. Sarajevo – Zavisno društvo Rudnik mrkog uglja "Breza" d.o.o. Breza za istraživanje i eksploataciju mineralne sirovine uglja na području općine Ilijaš
4. Prijedlog Odluke o novčanim podrškama u poljoprivrednoj proizvodnji na području općine Ilijaš za 2019. godinu
5. Prijedlog Rješenja iz imovinsko-pravne oblasti:
  - a) rješenje broj:06/1-31-171/14
  - b) rješenje broj:06/1-31-605/17
  - c) rješenje broj:06/1-31-955/17
  - d) rješenje broj:06/1-31-1117/17
6. Vijećnička pitanja i inicijative

#### AD-1

#### Izveštaj o realizaciji zaključaka sa 31. sjednice

Diskutanata po ovoj tački dnevnog reda nije bilo, pa je Općinsko vijeće jednoglasno usvojilo

#### Izveštaj o realizaciji zaključaka sa 31. sjednice

#### AD-2

Prijedlog Odluke o visini naknade za rad članova Savjeta mjesnih zajednica Općine Ilijaš

ALMA OMEROVIĆ – predsjedavajuća

Predlagač je uložio amandman na gore navedeni Prijedlog Odluke koji glasi: U članu 4. stav 1. alineja 2. se mijenja i glasi: "Članovi Savjeta po održanoj sjednici Savjeta mjesne zajednice. Naknada po ovom osnovu se isplaćuje za maksimalno 6 (šest) sjednica u toku jedne kalendarske godine, odnosno polugodišnje za 3 (tri) sjednice".

MUHAMED HANDŽIĆ – vijećnik BPS-Sefer Halilović

Drago mi je da je načelnik imao sluha da uozbilji rad Savjeta mjesnih zajednica i pretpostavljam da je pomoćnik i podrazumijevao da se po jednom sastanku daje 50,00 KM naknade za članove Savjeta mjesnih zajednica. Međutim, sad ovom Odlukom se i dalo do znanja da ne prisustvovanjem sastanku se ne dobija naknada. To će vjerovatno posebnim aktom Služba trebati dostaviti predsjedniku Savjeta mjesnih zajednica, a cijenim da će predsjednici davati kvalitetnije izvještaje o održavanju sastanaka i o prisustvu članova Savjeta.

Ono što mi se ovdje ne dopada i pokušat ću da utičem na tu Odluku koliko mogu, a to je smanjenje paušala predsjednicima Savjeta i to je, po meni, neopravdano. U mandatu u kojem sam ja bio predsjednik Savjeta znam da ti ljudi imaju zaista mnogo posla (govorim za one koji hoće i moraju raditi) i da taj paušal koji dobiju potroše za telefon, gorivo i eventualne obilaske mjesne zajednici u zavisnosti kolike je ona površine i koliko problema ima u mjesnoj zajednici, a sigurno ih ima.

Dakle, zamolit ću načelnika, ako je to moguće, a mislim da jeste i da ima dovoljno sredstava, da se predsjednicima Savjeta mjesnih zajednica ne umanjuje ovaj paušal sa 300,00 na 250,00 KM tj. da paušal ostane 300,00 KM ili ako je to satisfakcija da se i predsjedniku Savjeta mjesne zajednice sastanak računa 50,00 KM kao i članovima Savjeta. Ti ljudi zavređuju pažnju i imaju puno više posla nego mi vijećnici, samo ako hoće kvalitetno da rade.

ALMIR ŠPIODIĆ – vijećnik BPS-Sefer Halilović

Kao neko je doskora bio predsjednik Savjeta mjesne zajednice potpuno se slažem sa diskusijom kolege Handžića i ne bih se sada ponavljao, slažem se sa onim što je on rekao. Ne trebamo se upuštati u to da smanjujemo paušal predsjednicima Savjeta. Mjesna zajednica, kao najniži oblik organizovanja građana, gdje se građani prvo obraćaju predsjedniku Savjeta za sve potrebe koje imaju u mjesnoj zajednici, a pogotovo u mjesnim zajednicama gdje ima malo više stanovnika tu zaista ima mnogo posla. Mjesne zajednice koje su malo udaljenije od općine, a znamo kako je doći ovima iz Dragorada, Kamenice, Nišića u Ilijaš, a mora doći po zahtjevu građana da donese neki prijedlog, zahtjev ili kada ga neko pozove na sastanak. Njemu tih 250,00 KM ne može biti za troškove prijevoza, a

tako se oni i vode otprilike. Ima mehanizma da se taj paušal ne smanjuje, mislim da u Budžetu ima dovoljno novca. Ako ćemo realno govoriti, kad pogledamo koliko imaju za redovan rad neka Udruženja, odnosno konkretno Boračka udruženja imaju 60.000,00 KM godišnje za redovan rad, a mjesne zajednice 50. Mislim da Savjeti mjesnih zajednica puno više koriste građanima negoli Udruženja. Ne kažem da ne trebaju Udruženja. Ako uzmemo da se politički subjekti finansiraju sa 78.000,00 KM u Budžetu, a mjesne zajednice sa 50 na godišnjem nivou, hajdemo samo zamijeniti te dvije stavke i mislim da bi to bilo sasvim opravdano. Ja sam u ovoj Odluci u početku shvatio da će se članovima Savjeta isplaćivati 50,00 KM svaka dva mjeseca. Ako to tako izgleda, onda će ljudi dobivati po 25,00 KM mjesečno što je ponižavajuće. Korektno je da se mjesečno članovima Savjeta isplaćuje 50,00 KM, a da se predsjednicima Savjeta ne smanjuje ova naknada.

Ja znam da ćete vi ovu Odluku usvojiti onako kako ste i zamislili, ali ovo je neka moja dobronamjerna sugestija da i vi još malo razmislite da li je to uredu.

Ja govorim iz iskustva, jer sam prošao sve to.

HALID DIZDAREVIĆ – vijećnik SDA

Kolega Špiodiću niste dobro shvatili ovu Odluku. Naime, ide 100,00 KM svaka dva mjeseca, oni će imati 50,00 KM mjesečno, ali evo izgleda da ja nisam dobro shvatio. Iznos od 250,00 KM za predsjednika Savjeta nije mali i mislim da je zaista sasvim dovoljan za poslove koje obavljaju i ova naknada za članove Savjeta je takođe pohvalna, jer će sigurno doprinijeti da članovi Savjeta dolaze na te sastanke i da bude uspješniji rad Savjeta mjesnih zajednica.

ALEN HASKOVIĆ – zamjenik predsjedavajućeg

Cijenim da smo Odlukom da se i članovima Savjeta plaća naknada za rad, stimulisali te ljude da budu ažurniji i da prisustvuju sastancima i da doprinesu radu Savjeta mjesne zajednice. Do sada to nije bio slučaj, a vi znate kakva je bila situacija u mjesnim zajednicama, bili ste i sami predsjednici Savjeta mjesnih zajednica pa znate da u članovima Savjeta niste imali svoje prijatelje, nego uglavnom, neprijatelje. Ta simbolična naknada, ne bih je komentarisao, da li je dovoljna ili nije dovoljna, moramo uzeti u obzir okvire Budžeta i Budžet koji smo donijeli za ovu godinu i do kojih granica možemo izlaziti iz Budžeta i u kojoj mjeri rebalansom možemo povećati ovu stavku. Dakle, da ne bude da ovdje neko misli da je to puno, neko misli da je malo, cijenim da se taj rad svakako treba nagraditi i Odlukom Općinskog vijeća će to biti urađeno u narednom periodu, a danas ćemo donijeti Odluku o visini te naknade, ali zaista morao voditi računa i o Budžetu i stvarnim mogućnostima u Budžetu.

RASIM ŠEHIĆ – vijećnik SDA

Slušajući sve strane, u jednu ruku su upravu. Prvo, do sada nismo imali slučaj da su članovi Savjeta mjesnih zajednica imali ikakvu naknadu, a evo ovim se uvodi određena naknada, pa kolika tolika je, ali mogu se apsolutno složiti sa kolegom Muhamedom što je predložio, a maltene je to i zastupljeno, da se i predsjednicima Savjeta isplati ova ista naknada po odražanim sjednicama. Evo i mi vijećnici, imamo posebno naknadu vijećnički paušal, a posebno naknadu za prisustvo sjednici. Time bi napravili određeni kompromis gdje bi ipak, vjerujem, zadovoljili sam Savjet kao i predsjednike Savjeta, a to nije veliki iznos koji se ne bi mogao obezbijediti.

MUHAMED HANDŽIĆ – vijećnik BPS-Sefer Halilović

Ova moja konstatacija, moj prijedlog i prijedlog Rasima Šehića neka bude amandman na ovu Odluku, ako je moguće.

ALMA OMEROVIĆ – predsjedavajuća

U pismenoj formi dostavite amandman.

RASIM ŠEHIĆ – vijećnik SDA

Ako ste me pažljivo slušali, sam amandman bi mogao da bude sastavni dio ako su članovi Savjeta, ako se podrazumjeva da je član Savjeta i predsjednik, što bi trebalo da bude.

AKIF FAZLIĆ – općinski načelnik

Sve ovo što su pričali uvaženi vijećnici je prošlo kroz glavu nas predlagača. Razumijemo sve, razumijemo naša opredjeljenja koja smo postavili, ali imamo i neke limite. Dakle, mora se postaviti svaki nivo ili svaki resor, svaka vrsta djelatnosti u neki okvir. Kada su u pitanju Udruženja ili kada su u pitanju Vijeće, vijećnici, Mjesne zajednice to sigurno traži postavljanje finansijskih okvira za funkcioniranje svih tih aktera u ovim oblastima. Imamo sljedeću stvar: imamo drastičnu razliku između predsjednika i člana Savjeta što je nelogično. Dakle, predsjednik je u ovako koncipiranom Savjetu, prvi među jednakima, a mi imamo ogromnu razliku kada su u pitanju visine naknada. Ja ću vam reći samo primjer Novog Grada, kao ubjedljivo najveće općine u Kantonu Sarajevo i općina koja se približava da ima najveći Budžet, kod njih se plaća po sjednici, predsjednik Savjeta dobiva 50,00 KM, a članovi Savjeta 40,00 KM. Naravno, u Novom Gradu imaju uvedene Sekretare mjesnih zajednica koji, ja ne znam šta rade i koliko doprinose, ali govorim o pogledu kako se definiše pozicija tijela koje je kroz naš Statut i kroz Odluku o uslovima i načinu izbora definisano. Dakle, sve to je nekako uticalo da mi probamo naći kompromis, a ključni i pravi, po meni, odgovor biće na ovome da probamo napraviti razliku između ovoga što ste vi svi govorili i mi to znamo i zbog toga je nastala ova visina naknade za predsjednika što ta naknada pokriva njihove troškove djelovanja. Dakle, predsjednik Savjeta iz grada Ilijaša praktično ima pet puta manje troškove od predsjednika Savjeta u Dragoradima, jer predsjednik Savjeta iz Dragorada dok dva puta dođe u Ilijaš potrošiće pola ove naknade. Po meni, ova Odluka treba da ide u pravcu razdvajanja tih troškova koje prouzrokuje pozicija predsjednika Savjeta. Ona se, prije svega, odnosi na troškove prevoza, telefona i same naknade. Dakle, ja bih predložio i zamolio bih vijećnike da mi danas Odluku sa ovim amandmanom usvojimo kao jedno kompromisno rješenje i da joj stavimo rok tj. da kažemo da je ona do kraja godine ovakva, a da zaista tragamo i da dođemo do najboljeg rješenja koji će značiti i jednu vrstu pravednog odnosa i jednu vrstu pokrivanja troškova i efikasnijeg mehanizma finansiranja kako bi zaista imali neku situaciju s kojom će biti svi zadovoljni, a prije svega Savjeti mjesnih zajednica. Znači, moj prijedlog je da kažemo da je ova Odluka do kraja ove godine sa zaključkom da se zajedno izdefinira konačni model koji bo trebao dugoročniji da bude, a prije svega on počiva na ovome da definišemo troškove aktivnosti predsjednika Savjeta i da naravno probamo onda popraviti i poziciju članova Savjeta.

## MUHAMED HANDŽIĆ – vijećnik BPS-Sefer Halilović (replika)

Ja zaista, sve ovo slušajući, ne vidim svrhu svog boravka ovdje i dolaska na ovo Vijeće i dobro bi bilo da sve ovo što vi predložite donese kao dnevni red da usvojite, a možda da nas i ne zovete više na sjednice Vijeća, jer svi prijedlozi, inicijative, amandani ili bilo šta što mi podnesemo to je pro forme i ako ono ima svoju svrhu i ima svoju podršku. Evo ja sam dao prijedlog, naveo sam da to bude amandman koji vjerovatno neće iziskivati ni puno troškova, ima svoju opravdanost, a načelnik mi poredi općinu Novi Grad sa općinom Ilijaš. Tamo sekretar prima platu 1200,00 KM i to je profesionalno lice, a naravno oni koji prisustvuju, u tom slučaju predsjednik i članovi Savjeta mjesne zajednice, neće više dobiti nego 50,00 KM. Slaže se i naš predsjednik Savjeta mjesne zajednice, bilo koji, da dođe jednom ili dva puta mjesečno na sastanak i da dobije 50,00 KM, ali da nema neke tolike odgovornosti kolike bi imao sekretar. Taj sekretar daje i potvrde, izlazi na lice mjesta građanima tamo gdje je potrebno, daje im određena uputstva, prima od njih zahtjeve itd. Znači, sve te poslove radi sekretar u Novom Gradu. Kod nas to radi predsjednik Savjeta mjesne zajednice. On je i predsjednik i sekretar i sve to što treba da obavlja, obavlja taj čovjek. Ja imam iskustva i znam, a i mnogi ovdje, da je predsjednik opterećen toliko poslovima, a Savjetu samo podnosi Izvještaje, jer članovi Savjeta, bar do sada kod nas, nisu navikli da puno rade. Njima se podnese Izvještaj i oni dođu sa nekim pitanjima i inicijativama, kao što mi dođemo ovdje na Vijeće pa plasiramo načelniku, imamo mi svojih želja, pa vi vidite možete li ih riješiti. E tako rade članovi Savjeta mjesne zajednice. Ovo sam htio načelniku slikovito pokazati da nije predsjednik Savjeta mjesne zajednice u Ilijašu i Novom Gradu isto. Iz tog razloga sam uložio amandman. Do godine ko zna hoće li biti živi predsjednici Savjeta mjesnih zajednica i mi zajedno s njima. Da vidimo mi jesmo li za to da uradimo ovo o čemu govorimo ili nismo. Ja znam da će to proći onako kako vi pripremite i neka to ide, ali ja imam ovaj amandman pa glasajte za njeg ZA ili PROTIV.

## ALMIR ŠPIODIĆ – vijećnik BPS-Sefer Halilović

Načelnik se osvrnuo na to što sam ja rekao da ljudi sa gornjeg kraja imaju puno više troškova, nego predsjednik mjesne zajednice uzeli smo primjer grada Ilijaša, Podlugova ili Mrakova. Čovjek u Dragoradima ima 250 stanovnika u mjesnoj zajednici, a predsjednik mjesne zajednice u Podlugovima ima 5000 stanovnika. Ovaj u Dragoradima mora doći i ima jedan ili dva poziva dnevno ili ni jedan, a predsjednik mjesne zajednice u Podlugovima ima dnevno po deset poziva za davanje Potvrda za lične karte i sl. Znači oni imaju isto troškova samo što se ovaj na kraćim relacijama se kreće. Oni na kraju krajeva imaju isto troškova. Samo sam htio sugerirati ako bi smo išli u neku vrstu priče vezano za ovaj amandam da imate i ovo u vidu.

## AKIF FAZLIĆ – općinski načelnik

Odustajem od svoje diskusije i prihvatom amandman vijećnika Muhameda Handžića.

## ALEN HASKOVIĆ – zamjenik predsjedavajućeg (replika)

Ja takođe cijenim da predsjednici i članovi Savjeta mjesnih zajednica imaju jako puno posla, stalno su u kontaktu sa građanima, veliki je teret na njima i ne želim da se ovdje stekne dojam kako neko predsjednicima i članovima Savjeta mjesnih zajednica želi povećati naknadu, a opet da drugi ne žele to. Ja bih volio da ta naknada može biti veće. Međutim, treba sagledati neke realne okvire i meni je drago da načelnik, kao predlagač,



može prihvatiti amandman kolege Handžića da se predsjednicima Savjeta mjesnih zajednica da dnevnica od 50,00 KM po sjednici. Zaista ne želim da se stekne dojam kako mi kao ne želimo, a vi to želite, a kada je bilo glasanje za Odluku o potvrđivanju rezultata izbora u mjesnim zajednicama glasali ste PROTIV tih ljudi koje su građani birali, a danas se borite za njihova prava. Mi se svi borimo i zalažemo za to. Načelnik je rekao da će do Nove Godine ovakva vrsta Odluke važiti i da ćemo napraviti bolju Odluku vjerovatno sa novim Budžetom.

AKIF FAZLIĆ – općinski načelnik (replika)

Ja sam odustao od diskusije i prihvatam amandman vijećnika Muhameda Handžića.

ELDAR ŠEHIĆ – vijećnik SDP-a

Zamolio bih ubuduće kolega Haskoviću ako vi mislite da mi vas sada optužujemo da vi ne želite to, nemojte vi nas prozivati. Mi smo glasali tada tako, jer smo govorili da nije bilo po Ustavu i da nije bilo stavljeno kako treba u dnevni red. Vi sada hoćete da kažete da mi nismo glasali za te predsjednike Savjeta zato što su oni, hajde da kažemo iz SDA.

ALMIR ŠPIODIĆ – vijećnik BPS-Sefer Halilović (replika)

Kolega Haskoviću, rekli ste da smo glasali protiv tih ljudi, protiv njihovog imenovanja, što nije tačno. Rekao sam da sam glasao zbog Odluke koja je neustavna i provedena. Na prošloj sjednici sam čestitao novoizabranim predsjednicima i nemam ništa protiv tih ljudi. Nemojte nas sada uvlačiti u tu priču. Žao mi je što načelnik kasni na sastanak, ali vi ste nam otvorili diskusije da bi mogli replicirati jedni drugima do sutra. Bespotrebno ste otvorili raspravu. Nismo glasali protiv tih ljudi, glasao sam protiv Odluke koja je, po meni, donesena neustavno, a to ćemo ispitati na Sudu.

ALMA OMEROVIĆ - predsjedavajuća

Zaključila je raspravu po pitanju ove tačke dnevnog reda i dala pauzu od pet minuta da se pripremi tekst amandmana.

Pauza od 11:05-11:25h.

ALMA OMEROVIĆ – predsjedavajuća

Kolega Handžić i kolega Šehić su zajedno formulisali amandan, te ću zamoliti Rasima da pročita isti.

RASIM ŠEHIĆ – vijećnik SDA

U članu gdje stoji članovi Savjeta da stoji i predsjednici Savjeta po održanoj sjednici i dalje se tekst nastavlja kako je i navedeno.

ALMA OMEROVIĆ – predsjedavajuća

Amandman glasi: Član 4. stav 1. alineja 1. se proširuje sa tekstom: "predsjedniku Savjeta pripada pravo na naknadu za prisustvo sjednici Savjeta mjesne zajednice u iznosu od 50,00 KM. Naknada za prisustvo sjednici se isplaćuje za maksimalno šest sjednica u toku

jedne kalendarske godine, odnosno polugodišnje za tri sjednice".

Diskutanata po ovoj tački dnevnog reda više nije bilo, pa je Općinsko vijeće, uz navedeni amandman, većinom glasova donijelo

Odluku o visini naknade za rad članova Savjeta mjesnih zajednica Općine Ilijaš

AD-3

Prijedlog Odluke o davanju prethodne saglasnosti za dodjelu koncesije privrednom subjektu JP Elektroprivreda BiH d.d. Sarajevo – Zavisno društvo Rudnik mrkog uglja "Breza" d.o.o. Breza za istraživanje i eksploataciju mineralne sirovine uglja na području općine Ilijaš

ALMA OMEROVIĆ – predsjedavajuća

Naglasila je da je dio Odluke koji je nedostajao u materijalu, dostavljen na stolove.

AKIF FAZLIĆ – općinski načelnik

Molim vas da taj dio sada pogledate, jer je to najvažniji dio ove Odluke, jer u njemu definišemo zaštitu naših građana i u njemu definišemo ono što mi želimo i to je ubjedljivo najznačajniji dio ove Odluke i žao mi je da se desilo da vi niste u materijalu dobili taj dio. Dakle, to je član 3:" Saglasnost iz člana 1. ove Odluke daje se pod uslovom da Zavisno društvo Rudnik mrkog uglja "Breza" d.o.o. Breza obavezuje i navedeno je šta sve mora ispunjavati". Ono što je najvažnije je ovaj zadnji pasus koji kaže: "Izvan granice eksploatacionog polja iz člana 1. stav 2. ove Odluke definisanog Prostornim planom Kantona Sarajevo ne postoji obaveza Općine Ilijaš za pribavljenja mišljenja niti saglasnosti za novu gradnju i legalizaciju objekata, kao niti propisivanje posebnih uslova građenja". Zašto je važan ovaj prijedlog Odluke? Važan je zato što smo za 2/3 Prostornog plana u kom je definisano pravo na eksploataciju ovom Odlukom reducirali taj prostor i što smo za nekih blizu 300 hektara koliko je Prostornim planom Kantona Sarajevo definisano eksploataciono polje mi ga uz prijedlog ove Odluke sveli na nešto manji od 70 hektara i time došli do prostora koji mi možemo, ako ovo prođe, ovo je samo prethodna saglasnost, rudnik svu proceduru sa Kantonom Sarajevo, kad se potpiše koncesioni Ugovor, onda ćemo mi doći u odnos sa rudnikom koji znači definisanje ovih 70 hektara. Da samo još malo pojasnim. Vi znate, bila je ova Odluka prije godinu i po dana i evo te Odluke kad se rudnik obratio i tražio kako je to definisano Prostornim planom, dakle, saglasnost za eksploataciono polje Podgora-Popovići, pa saglasnost eksploataciono polje Kamenice, pa saglasnost eksploataciono polje Sovrle-Salkanov Han, saglasnost na eksploataciono polje Breza koje se odnosi, mislim i na područje Lješeva i eksploataciono polje Potkraj. Dakle, sve ovo u aktivnostima koje smo mi imali sa rudnikom mrkog uglja, sa Kantonalnim ministarstvom privrede, sa Elektroprivredom Federacije BiH, sveli smo u neki dogovor da današnjom Odlukom predlažemo samo davanje saglasnosti na ležište u jami Sovrle-Salkanov Han i to na tri ove tačke trigonometra što znači površine 70 hektara. Znači, moramo znati da je Prostorni plan prvi i opšti preduvjet kada su u pitanju koncesije. Sljedeće što je jako bitno, rudnik mrkog uglja je, shodno Zakonu o rudarstvu od Federalnog ministarstva dobivao prava na eksploataciju i Federalno ministarstvo je nadležno da daje pravo na eksploataciju. Vidjeli ste da su oni pravo na eksploataciju tokom niza godina dobivali po pojedinim područjima, 1962., 1986., 2006.godine. Dakle, davale su se saglasnosti. Ono što je novina jeste da je novinu donio Zakon o

koncesijama, a taj Zakon o koncesijama je praktično izraz da se ta eksploatacija na neki način s aspekta naknade za eksploataciju, odnosno koncesione naknade definiše i da onaj ko eksploatiše plaća naknadu onome ko je nadležan za ubiranje naknade. Ono što je interesantno kada je u pitanju podzemna eksploatacija, to je po Zakonu o rudarstvu sve nadležnost Federacije. Međutim, kada se donosio Zakon o koncesijama, onda su vjerovatn Kantoni bili jači, a vjerovatno prije svega, nacionalni odnos Kantona u Federaciji, pa se Zakon o koncesijama, odnosno pravo na koncesije za te rudnike koji su od Federalnog značaja kada je u pitanju koncesiona naknada vratio na Kanton, kako bi Kantoni ubirali ovaj prihod. Rudnici su u Federaciji gotovo završili, kada su u pitanju koncesione naknade, završen je sa ZE-DO Kantomom i ostaje ovaj dio koji se odnosi na Sarajevski Kanton. U Sarajevskom Kantonu postojala je Odluka koja je donesena 2002. ili 2003. godine kojom je definisana naknada za eksploataciju za one firme koje nisu imale Ugovor o koncesiji. Pošto rudnik nije imao Ugovor o koncesiji, Kanton je pokrenuo pitanje naplate naknade za tu eksploataciju. Ta naknada se nažalost nije mogla platiti i taj spor je sada na Sudu. Neka orijentaciona cifra, vjerovatno i zbog kamata, je cca 1.000.000,00 KM, dakle rudnik bi trebao platiti Kantonu, po Kantonalnom zakonu to se dijeli u omjeru 60:40% općine i kanton što bi značajno doprinijelo ili će doprinijeti i prihod u Budžetu naše općine. Ta Odluka je prije godinu stavljena van snage i trenutno nema nikakvog propisa kojim se reguliše ono što se trenutno radi, odnosno što se radilo u zadnjoj godini, što se sada radi. Dakle, jako je bitno da se dođe do koncesionog ugovora, da se dođe do osnova za prava naplaćivanje koncesione naknade. Ovdje imamo dvije vrlo bitne stvari. Prva je da dođemo u poziciju da možemo naplaćivati ono što oni eksploatišu i druga je da ovim prijedlogom Odluke konačno definišemo prostor djelovanja rudnika. Rudnik je djelovao mimo ovoga. Mi znamo, a evo tu je i Mehmed koji radi tamo. To su utvrdili federalni inspektori i utvrđivat će, ali sada ćemo kada se provede ovaj postupak i provedu sve procedure, doći do akta koji će biti nešto što brani nas, našu poziciju i naša prava. Ovo je pogotovo jako bitno da konačno tamo na terenu, prije svega mislim na Sovrle-Salkanov Han, a Salkanov Han je samo u jednom malom dijelu, ali u osnovi Sovrle, će se znati jasna granica i na osnovu te granice ćemo izdefinisati stanje objekata koji jesu tamo legalno napravljeni, ilegalno napravljeni i što se kaže, doći u poziciju da se neki objekti legaliziraju, doći u poziciju da na nekim prostorima će ljudi moći praviti kuće kako smo to rekli zadnjim stavom u prijedlogu ove Odluke, jer do danas mi to nismo mogli, korišten je isključivo Prostorni plan i sve što je u okviru Prostornog plana i Rješenja Federalnog ministarstva za pravo na eksploataciju. Dakle, tu je rudnik stalno sporio prava na gradnju i tu smo mi imali i imamo i dalje, neću reći problema, ali ne možemo riješiti nekim našim građanima koji će kada se sve ovo provede neki doći u poziciju da mogu sve završiti, a za one koji su direktno u eksploatacionom polju i okviru ove Odluke i dalje će važiti pravila koja moraju važiti kada je u pitanju prostor na kome se vrši eksploatacija. Da bi rudnik završio posao i došao u poziciju da regularno radi, mora doći do koncesionog Ugovora. Dva elementarna preduslova za koncesioni Ugovor je Prostorni plana Kantona Sarajevo i to imaju i drugi je prethodna saglasnost Općinskog vijeća. Sve dalje aktivnosti se rade sa Ministarstvom privrede. Općina po Kantonalnom zakonu o koncesijama daje svog člana u Komisiju za koncesije i taj član će praktično štititi naše interese i štititi ovu Odluku kada je u pitanju konačno finaliziranje Ugovora o koncesiji na koji daje saglasnost Vlada Kantona Sarajevo. Ja mislim da ovom Odlukom mi značajno popravljamo i definiramo stanje na terenu i zbog toga predlažem da je ovo Općinsko vijeće usvoji. Neću sada govortiti, a trebamo i o tome govoriti, jer mi smo odgovorni ne samo za ovu općinu, nego smo odgovorni i za Federaciju i za državu Bosnu i Hercegovinu. Energetski sektor je prevažna stvar, prevažan sistem i moramo imati senzibiliteta i prema tome. Ne trebamo ostaviti stvari da se dešavaju kao što su se do sada dešavale gdje je neko radio šta je radio i kako

je radio. To trebamo definisati i definisati uslove kako će raditi. Naravno, kontrole, šta se ispod zemlje radi, vrši Federalna inspekcija, ali mislim da će kada se potpiše Ugovor o koncesijama i tim inspekcijama to biti okvir za njihovo djelovanje. Ja sam otvoren za sva pitanja uz razumijevanje i težine koja ona jeste, ali stojim iza toga da mi ovom Odlukom samo uređujemo odnose.

ALMIR ŠPIODIĆ – vijećnik BPS-Sefer Halilović

Zaista mi je žao što nismo u materijalima dobili ovaj dio Odluke koji sada imamo, jer ja sam se pripremao na osnovu ovoga što sam imao. Ova Odluka je znatno bolja u odnosu na onu prethodnu koja je bila, kako reče načelnik, prije godinu i po dana. Samo ne znam sa ovom Odlukom koliko rješavamo i zaštićemo naše građane ako nam se u tu Odluku ubaci jedna rečenica koja kaže da će se zaštićeno stanje izgrađenih stambenih i gospodarskih objekata izdavati saglasnost i uslovi za legalizaciju na svim mjestima gdje se ne očekuje intenzivna eksploatacija čumura. Šta podrazumjeva intenzivna eksploatacija čumura? Mi smo već imali problema s tim. Već imamo lošu komunikaciju i saradnju sa rudnikom mrkog uglja u Brezi. U naselju Doci, a to je bilo i u lokalnim medijima i većina vas je upoznata, da su neke kuće već oštećene, da su se na nekim kućama već pojavile pukotine i ja sam svjedok toga da se prilikom detonacija, a pogotovo u noćnim satima kada se sve stiša, dešavaju potresi i vrlo je neprijatno se probuditi u kasnim noćnim satima kada se kuća sva trese i čujete detonaciju. Mene i većinu građana Podlugova su te detonacije protjerale. Ja sam pod takvim detonacijama učio i završavao prvi razred i možda zbog toga danas imam problem, jer sam pod tim stresom sam usvajao neka prva znanja. Znači nije samo stvar hoćemo li mi riješiti ljudima građevinske dozvole ili nećemo. Neće se riješiti građevinske dozvole, jer rudnik neće ispoštovati ovu Odluku. Kada mi donesemo ovu Odluku, oni će se pozvati na Zakon o rudarstvu, na Zakon o eksploataciji mineralne sirovine, čumura itd. Odluka Općinskog vijeća ne može biti iznad Zakona koji je već usvojen. Ova Odluka je super. Imate naselje Marići. Bio sam na jednom sastanku gdje su prisutni bili direktor rudnika Breza, načelnik Breze zajedno sa našim načelnikom i građani naselja Marići koji nemaju građevinsku dozvolu samo zato što su bili blizu ovog rudnog polja. Obećali su tada da će dati građevinske dozvole ukoliko se izvrše neka ispitivanja da vide od kakvog su materijala napravljene te kuće, ali nikada nisu došli da to urade. To je bilo u januaru 2017. godine. Ja sumnjam u dobru saradnju sa rudnikom i mislim da ćemo nanijeti štetu našim građanima u smislu da će imati problema u nekom novom periodu kada se bude vršila eksploatacija čumura. Ja predlažem da možda prolongiramo ovu Odluku. Ona jeste znatno unaprijeđena u odnosu na onu prije, ali nije ovo nešto što bi mi trebali staviti ispred ljudi ispod čije imovine će se vršiti ta eksploatacija. Ja sam tražio na kartama ove parcele i ovo upravo obuhvata naselje Marići gdje ima izgrađenih preko 20 kuća koje nemaju građevinsku dozvolu. Još ovu godinu imaju pravo koristiti struju koju su priključili na dvije godine. Poslije toga će im Elektroprivreda isključiti struju. Činjenica je da mi moramo poštovati i braniti naše resurse kao što je Elektroprivreda, ali mi moramo, prije svega, zaštititi pravo građana. Moramo zaštititi naše građane. Mislim da, ako su već toliko ozbiljni, ovo je drugi put, načelnik je jednom povukao tu Odluku, da nam šalju prijedlog, mišljenje i saglasnost da bi mogli pokrenuti koncesiju. Zašto se neko nije udostojio ispred rudnika da danas dođe ovdje i da nam sve ovo lijepo obrazloži. Ovo je ista situacija kada smo davali koncesiju na izgradnju mini hidro-centrala na rijeci Bosni, pa su ljudi došli ovdje i sve nam to obrazložili.

Prvo, mi nismo zvali predstavnike rudnika na ovu sjednicu. Lično mislim da nam oni nisu ni trebali. Ovdje mi, prevashodno, govorimo o svojoj poziciji, a oni bi možda ispričali neke priče koje bi, možda, bile subjektivnog karaktera ili ne bi bile subjektivnog karaktera. Ja mislim da mi jako dobro razumijemo ovu oblast i da mi znamo šta želimo i da znamo kako to postaviti. Ovo što je član 3. ovog prijedloga Odluke predvidio, vjerovatno njima to baš i ne odgovara, ali to nas ne interesuje. Mi smo ovdje u predzadnjem pasusu člana 2. lijepo kazali da će, ukoliko se potvrdi da rudnik Breza ne izvršava gore navedene obaveze, Općinsko vijeće povući datu saglasnost. Proces dobijanja koncesionog Ugovora nije lak, nije brz. Ja vas mogu informisati da je juče Vlada Kantona Sarajevo utvrdila javni interes za ove dvije mini hidro-elektre, a znate kada smo mi na Općinskom vijeću dali prethodnu saglasnost. Dakle, itekako su imale puno obaveza i firme da se sve to pripremi, da prođe procedure, da se izdefiniše i meni je zadovoljstvo da je Ministarstvo privrede Kantona Sarajevo zaista ozbiljno vodilo ovaj postupak. Dijelom sam bio u toku toga i znam da će sigurno Ministarstvo privrede i ovaj postupak isto tako ozbiljno voditi i štiti interese Kantona, a kroz te interese i naravno interese općine. Dakle, situacija gdje su na eksploatacionom polju na kom je rudnik imao Rješenje za eksploataciju, neko napravio kuću ne može ljudi niko abolirati. Ne možemo mi riješiti taj problem.

“Zašto sam ja napravio kuću na odobrenom eksploatacionom polju Rješenjem nadležnog organa koje se zove Federalno ministarstvo za rudarstvo”? Dakle, moramo i s tog aspekta gledati stvari na terenu. Ali, zato želimo da ovom Odlukom u Docima ne moramo više nikoga pitati za dozvole, jer je linija sada povučena i dakle idemo u legalizaciju svih objekata bez ikakvog uticaja rudnika. U članu 3. stav 3. naveli smo obavezu da se izvrši izrada Elaborata utjecaja otkopavanja glavnog i podinskog ugljenog sloja, unutar granica eksploatacionog polja, sa aspekta zaštite građevinskih i drugih infrastrukturnih objekata nadzemlja. Ovo će biti svi elementi u koncesionom Ugovoru koji će potpisati Kanton. Ovdje moramo shvatiti da se neke kuće neće moći legalizirati. Ali, moramo i shvatiti da oni koji su gradili te kuće su krenuli u izgradnju ne znam na osnovu čega. Neko ko je gradio u nekim graničnim linijama, pa očekivao da će se moći to riješiti, dakle značajan broj njih koji jesu u graničnim linijama gradili će se moći riješiti, a oni koji su u epicentru toga neće se moći riješiti. Znači, nikada se neće moći riješiti, donijeli mi ili ne ovu Odluku. Sljedeće što je važno za ovu Odluku ljudi, mi na prostoru Popovića, prostoru dijela Lješeva, prostoru većeg dijela Salkanovog Hana, ako ne donesemo ovu Odluku, Rješenja eksploatacije su na snazi, Prostorni plan je na snazi, mi smo tu “svezanih ruku”. Dakle, kada se sklopi koncesioni Ugovor, sve se to svodi na ovih 70 hektara. Ja mislim da je to puno bolje stanje nego što ga danas imamo i zbog toga predlažem ovu Odluku, da zadržavamo isto stanje, a ne daj Bože da kvarimo stanje zaista nikada ne bih bio predlagač ove Odluke. Još jedanput napominjem da smo imali niz sastanaka i u Ministarstvu privrede i u Elektroprivredi i da su ljudi iz rudnika razumjeli ovu stvar i mislim da trebamo iskoristiti tu priliku da su oni dovedeni u poziciju da naprave ovaj zahtjev ovakav kakav jeste, a on je naravno napravlje i stanje rezervi dole koje imaju i stanjem određene vrste dogovora tako da još jednom apeliram da ovo Vijeće donese ovu prethodnu saglasnost uz sva ova razmišljanja i neka tih razmišljanja i ja ih razumijem, ali ipak treba da nas vodi ono što jeste neki cilj, a to je popravljanje stanja na terenu i popravljanje pozicije općine Ilijaš kada su u pitanju odnosi između i rudnika i resornih ministarstava koja su nadležna za rad rudnika.

MUHAMED HANDŽIĆ – vijećnik BPS-Sefer Halilović

Moram reći da u potpunosti razumijem kolegu Špodića za zabrinutost koju je izrazio, a vezano za ovu koncesiju. S druge strane, cijenim veliku žrtvu i odajem veliko priznanje i načelniku na koliko se smanjilo to područje rudnog polja u odnosu na prošli prijedlog davanja saglasnosti ovdje, a imali smo u prilici da radimo 7-8 dana na tome ja i Špodić, da vadimo sve te čestice, tako da mi, ovim izlaganjem načelnika i ovim što smo dobili u materijalu, kada povučemo jednu paralelu, dolazim do utiska da su ovi rudari već ovdje negdje ispod nas, da oni već kopaju ovdje ispod nas, a da mi to polako legalizujemo. Ako kolega Špodić kaže da se njemu tresu prozori na kući, inventar u kući, ako to isto potvrđuju kolege iz Mrakova i dijelom iz Podlugova, o čemu mi to onda pričamo. Dakle, legalizujemo ono što ljudi rade, a nikog ne pitaju. Mi dali saglasnost ili ne, mi nismo nadležni da donosimo Odluke po tom pitanju. Odluku donosi Federalno ministarstvo, Kanton po Prostornom uređenju to uređuje, a mi dajemo saglasnost na nešto što se već dešava tu kod nas. Bojim se da generacije koje su iza nas, ma koliko to bilo, da li 10, 15 ili 50 godina, će morati iseliti iz Ilijaša. Meni je žao zbog naših sugrađana koji su doživjeli migracije iz Istočne Bosne koji su došli sad ovamo i ne daju im mira nekakvi vlasnici rudnika ni ovdje gdje su napravili svoje kuće. Neko im je tamo rušio kuće po Višegradu, Srebrenici, Žepi i sad će im rušiti kuće naši bageri po Sovrlama. Ljudi moji dokle taj osjećaj humanosti ide. Ovo je nevjerovatno. Nikada neću glasati za ovakvu saglasnost, kada bi se radilo o životu, da rade sva moja familija i da zarađuju za život, da se diraju i pomjeraju, a pomjerat će se ljudi koji su migrirali iz Istočne Bosne u Ilijaš koji je miran i gdje su našli svoj smiraj. Vodite računa, posebno vi vijećnici koji ste iz tih područja migrirali zajedno sa svojim roditeljima ovdje, gdje to vi idete i za što dižete ruku, pa vi izvolite.

AKIF FAZLIĆ – općinski načelnik (replika)

Ja prvo želim da uvažavam našu državu. Naša država 1962. godine je bila Jugoslavija, a u njoj Republika Bosna i Hercegovina. I Republika Bosna i Hercegovina je 1962. godine prvo dovela rudnik u Sovrle. Dakle, prvo je rudnik došao u Sovrle, a onda su iza toga dolazili neki ljudi. Znamo, iza 1996. godine dolazili su ljudi koji su bili protjerani. Ali dajte da poredamo stvari i da objektivno pričamo. Nemojmo pričati da neko sada njih goni. Dakle, oni su došli na nešto što je već prije bilo zauzeto regularnim Rješenjima Republike Bosne i Hercegovine. Dajte da samo objektivno pričamo. Materija jeste složena, jeste teška, razumijemo mi sve to, ali nemojte da pravimo sada neku vrstu populizma.

MUHAMED HANDŽIĆ – vijećnik BPS-Sefer Halilović

Zaista meni populizma ne treba. Ja sam ovu državu branio. Ja i moje kolege koji su punoljetni ovdje smo branili tu državu.

ALMA OMEROVIĆ – predsjedavajuća

Kolega Handžiću, zamolit ću Vas samo da se držimo teme tj. tačke dnevnog reda.

MUHAMED HANDŽIĆ – vijećnik BPS-Sefer Halilović

Ja se držim teme i zašto niste načelnika prekinuli?

ALMA OMEROVIĆ – predsjedavajuća

Nisam načelnika prekinula, jer ste Vi prvi počeli sa ovim nekim stvarima koje nisu tema ove tačke dnevnog reda.

Zamoliti ću Vas da govorite o Prijedlogu Odluke o davanju prethodne saglasnosti za dodjelu koncesije privrednom subjektu JP Elektroprivreda BiH d.d. Sarajevo – Zavisno društvo Rudnik mrkog uglja "Breza" d.o.o. Breza za istraživanje i eksploataciju mineralne sirovine uglja na području općine Ilijaš.

MUHAMED HANDŽIĆ – vijećnik BPS-Sefer Halilović

Predsjedavajuća, o tome ja i pričam. Nemojte meni povlačiti sada da ja dižem paniku vezano za to što su ljudi iz Istočne Bosne doselili ovdje i da ih ja nagovaram ne neko tjeranje. Ne. Ja upozoravam, a upozoravali smo i prije. Nije nama niko kriv što imamo nakaradnu vlast od 1996. godine pa na ovamo, što su uništili sve što se moglo uništiti što smo mi borci stvorili. Vi ćete ispaštati, a ti prekidaš mene još djevojčice draga.

ALMA OMEROVIĆ – predsjedavajuća

Kolega Handžiću, zamoliti ću Vas da poštujete red ovog Vijeća, da poštujete Poslovnik i da me ne nazivate djevojčicom, jer ja sam za Vas predsjedavajuća. Izričem prvu opomenu i molim da se držite teme.

MUHAMED HANDŽIĆ – vijećnik BPS-Sefer Halilović

Opomeni me još jednom, nije uopšte problem. Vi samo znate opominjati, vi ništa drugo i ne radite. Dakle, meni nemojte podvlačiti ono u čemu vi mnogi niste učestvovali, a ja jesam i žalosno je i tužno to o čemu vi govorite i prekimate me za nešto što ja govorim o činjenicama, a ne pretpostavkama.

SEAD ŠEHIĆ – vijećnik SDA

Ovdje treba malo "spustiti loptu" i rekao bih kolegi Handžiću da ne plašimo tako ljude, pogotovo ljude iz Istočne Bosne. Ja sam iz Istočne Bosne i nismo mi našli smiraj ovdje, nego smo kupili svoja imanja legalno i legitimno. To je jedna stvar. Druga stvar, treba se osvrnuti na ono da je opština Breza starija od opštine Ilijaš i još od prije koliko godina rudnik tamo djeluje, pa ljudi žive tu i da to nije tolika panika i strahoba koliko se priča. Ipak postoje Stručne službe, Kantonalne i Federalne inspekcije koje vode računa i ne možemo tako pričati bez neke stručne ekspertize. Da li je neka inspekcija došla ili nije došla, nemojmo paušalno pričati o tome.

ALMIR ŠPIODIĆ – vijećnik BPS-Sefer Halilović

Dijelom se slažem, niko nas nije doveo ovdje da se smirimo, mi smo kupili svoja imanja i nastanili smo se u dijelu Podlugova i ostalih dijelova i slobodno sebi dajem za pravo da govorim, jer sam i ja sa tih područja. Malo me iznenađuje ova zadnja načelnikova diskusija "ko prvi djevojci, njegova djevojka". Mislim da to nije pravilo, "ko zadnji djevojci, njegova djevojka". Pravim digresiju, metaforu, vezano za ovo. Prvi je došao rudnik i to je Bogom dano da bude rudnik. Ne može biti rudnik preči od ljudi. Ne može država biti preča od građana i od ljudi. Ovu državu čine mjesne zajednice, a mjesne zajednice čine građani, pa

općine, pa kantoni, pa ide prema vrhu. Kakva je svrha države i Elektroprivrede ako nema kome prodavati svoje proizvode koje proizvodi na osnovu rudnika. Ovo što kaže gospodin Šehić da nije ovo strašno, pa dođite u Doce kod Avdije Hrvata u kuću i pogledajte kako su ispucale pločice u kupatilu. I pričate da nije strašno. Dalje, dođete u kuću Husić Nusreta i pogledate kako je ispucala kuća. Pošaljem zahtjev, tražim sastanak sa Upravom rudnika, jednom ne odgovore, drugi put ne odgovore. Zatim ih zovemo telefonom i onda dođu sa aparatom iz 60-tih godina da ispituju da li ima potresa ili nema. O čemu mi pričamo. Znači, ako donesete ovu saglasnost, kao što reče kolega Handžić, otjerat će nas iz naših domova. Ljudi ne mogu na miru da spavaju, da se odmaraju, jer ih bude detonacije i potresi. Ovo što do sada rade mi ćemo im legalizovati, a traba im totalno zabraniti iskopavanje i uznemiravanje građana Mjesne zajednice Podlugovi.

AKIF FAZLIĆ – općinski načelnik (replika)

Moram replicirati na ove stavove. Dakle, zašto je Sovrsko polje bilo prazno, bez kuća prije 1992. godine? Zato što je Rješenjem Federalnih ministarstava, odnosno tada Republičkih ministarstava proglašeno eksploataciono polje i niko nije mogao dobiti dozvolu i nisu se pravile kuće. Rat je donio šta je donio. Pokrenuo je migracije. Natjerao je mnoge ljude da traže sebi dom. Hvala Bogu da je Ilijaš bio u prilici da pruži bar nešto da mnogi ljudi ovdje prave kuće i da se tu smjeste. Nažalost, i to niko neće da kaže, mnogi mešetari su iskoristili priliku i prodavali ljudima parcele na kojima se nije smjelo niti moglo graditi. I dobili smo situaciju kakvu smo dobili. Dakle, o pravu, odgovorni smo, na Vijeću smo. Nemojte to “ko prvi, ko drugi”. Jasna su prava. Rješenja iz 1962. godine i sada su na snazi, nisu povučena. Kad pričamo o tome moramo itekako slijediti propise koji su u Zakonima koji regulišu ovu oblast. Još jedanput podcrtavam, ne možemo abolirati neke ljude od vlastite odgovornosti zato što je napravio kuću u epicentru eksploatacionog polja. Nema tog propisa ljudi, donijeli Odluku ili ne donijeli. Ovom Odlukom sužavamo prostor. Dakle, pravimo jedan puno veći prostor gdje možemo djelovati ljudima pružiti priliku tu da prave. Nedonošenjem ovoga, mi i dalje ostajemo u okviru eksploatacionih polja na bazi Rješenja Federalnog ministarstva i Prostornog plana Kantona Sarajevo i odustajemo od koncesionih naknada koje trebaju da plaćaju oni koji vrše eksploataciju. Dakle, nemojmo praviti zamjene teza. To je suština. Ako neko želi i misli da može sve to zaustaviti i da se mogu poništiti sva ta Rješenja, onda ima pravo na neki način da bude protiv ove Odluke. Argumentacija je tu i trebamo se opredjeliti za najbolje rješenje i ja pozivam da tako razmišljamo i da se opredjelimo za ono što jeste bolje, nego što je današnje stanje.

ALMIR ŠPIODIĆ – vijećnik BPS-Sefer Halilović (replika)

Poštujem sve ovo što kažete. Dobro ste otvorili ovu temu kada kažete zahvaljujući nekim mešetarima ta se zemlja gore prodavala. Zahvaljujući mešetarima koji primaju platu u ovoj općini i zajedno su mešetarili sa tim “nekim” mešetarima pa su dozvolili prodaju, uknjižbu itd. te zemlje. Znači, bilo je mešetara i u ovoj Službi. Da vam kažem još nešto. Ako govorimo o Sovrlama, imate situaciju gdje je jedna kuća dobila građevinsku dozvolu, a sve ostale okolo nisu dobile građevinsku dozvolu. Ko je tu mešetario? Znači, ti mešetari su morali imati saučesnike u ovoj ovdje ustanovi, pa su zajedno mešetarili, zajedno pretvarali poljoprivredno u građevinsko zemljište itd., i podvaljivali su ljudima. A mi, između ostalog, imamo i komunalne inspektore, i građevinske inspektore i oni bi trebali da budu na terenu, trebali bi da uoče nelegalnu gradnju, da upozore ljude. Neko je trebao da upozori te ljude koji su došli na Sovrle i oni nisu znali da je tu rudnik. Nismo mi svi dovoljno, moram biti brutalno iskren, ni pismeni, a pogotovo ljudi koji su živjeli u ruralnim dijelovima Istočne



Bosne. Moja majka, da nije bilo mog oca, mene, starije braće, ne bi znala pročitati zato što nije imala priliku da se školuje. Takvih majki je većina u Podlugovima koje nisu imale koga da im pomogne, ne govorim u lošem kontekstu. Znači, neko je trebao pružiti pravnu pomoć tim ljudima. Ti mešetari koji su ih protjerali su ih ponovo ovdje prodali po vrlo skupoj cijeni zemlju gdje su ih navukli da prave kuće i danas imaju problema zbog toga.

ALMA OMEROVIĆ – predsjedavajuća

Kolega Špiodiću, zamolit ću vas da pazite na riječnik, da ovdje ne dižemo nikakve tenzije u smislu ti mešetari što su protjerali, a znate o čemu govorim. U potpunosti sam vas razumjela i rekli ste da imate najbolju namjeru, ali pazite malo o čemu govorite, šta poistovjećujete.

ALEN HASKOVIĆ – zamjenik predsjedavajućeg (replika)

Imamo na dnevnom redu Prijedlog Odluke o davanju prethodne saglasnosti za dodjelu koncesije privrednom subjektu JP Elektroprivreda BiH d.d. Sarajevo – Zavisno društvo Rudnik mrkog uglja "Breza" d.o.o. Breza za istraživanje i eksploataciju mineralne sirovine uglja na području općine Ilijaš. Dakle, ljudi su krenuli u proces dobijanja koncesije nad određenim eksploatacionim poljem u kome realno oni već uveliko vrše eksploataciju htjeli mi to priznati ili ne. Dakle, ljudi su skoro pa završili radove u ovom eksploatacionom polju. Pred nama je Odluka o davanju prethodne saglasnosti koja je samo jedan korak u konačnom dobijanju prava na koncesiju mrkog uglja Breza. Znači mi možemo danas podržati ili nepodržati ovu Odluku. Mislim da bi je trebali podržati s obzirom da se radi skoro o završenim poslovima. I ova Odluka ima niz pozitivnih stvari. Kao prva pozitivna stvar, reducirano je i jasno uokvireno eksploataciono polje koje se sada prostire na 70 hektara. Ukoliko oni dobiju u konačnici eksploataciju, to će značiti da će veliki broj građana moći ostvariti legalizaciju svojih objekata koji u ovom trenutku ne mogu ostvariti. Znači, koji će biti van tog eksploatacionog polja i oni sigurno dobijaju legalizaciju svojih objekata, a neki i unutar tog polja. Rudnik će davati mišljenja na te procese legalizacije na zahtjev općine Ilijaš. Kao treća stvar, ako oni dobiju tu koncesiju, mi imamo danas priliku da se prihvatimo dijela tih koncesionih prihoda. Ne vidim niti jedan razlog da ne podržimo ovu Odluku koja je samo jedan dio procesa u konačnom dobijanju prava na koncesiju. U sklopu ove Odluke imamo niz benefita i za našu općinu i za građane tog područja. Do sada nije bilo ovakvih Odluka i sami kažete da su to bila šira eksploataciona područja, a ovim smo to koncipirali i ljudi su tu skoro završili posao. Da mi dajemo sada njima Odluku i neku vrstu saglasnosti da tek trebaju ući u to područje i da mi to možemo zaustaviti i ja bih postavio pitanje je li mi to trebamo raditi ili ne. Ljudi tu rade, skoro su završili posao i mi samo trebamo uzeti ono najbolje što nam se u ovom trenutku nudi.

MEHMED SINANOVIĆ – vijećnik SDA (replika)

Repliku upućujem kolegi Špiodiću. Teška i velika riječ protjerati i otjerati. Ako se malo vratimo u historiju, rudnik na području općine Breza egzistira od 1907. godine i od tada do sada vrši eksploataciju mineralnih sirovina i nikog još iz Breze nisu otjerali i Breza postoji još uvijek i postojat će. Moja kuća se nalazi 350 m od granice eksploatacionog polja i neće me sigurno otjerati. Da se dešavaju i da se čuju posljedice miniranja, to je sigurno. Međutim, ova Odluka za koju mi danas trebamo glasati i predlažem da je podržimo, obuhvata i sužava područje isključivo na područje Sovrla, odnosno na područje brda Kostrache. I ako malo bolje pogledamo brojeve parcela, vidjet ćemo da tu većinom se

nalazi neizgrađeno područje. Dakle, obuhvata područje na kojem nema stambenih objekata, odnosno ima ih, ali vrlo malo. Ne obuhvata područje Marića. Ono je obuhvaćeno nekim drugim eksploatacionim poljem, odnosno nekim drugim granicama. Ova Odluka to ne obuhvata i ova Odluka sužava prostor i želim čestitati načelniku na borbi koju je uložio da se suži taj prostor eksploatacionog polja koje oslobađa naselje Doca i to naselje neće imati problema kod dobijanja građevinskih dozvola.

SEAD ŠEHIĆ – vijećnik SDA (replika)

Ne bih ovu temu puno širio dalje, jer kolega Mehmed i Hasković su to lijepo obrazložili. Ja samo pitam šta je alternativa? Evo usvojimo ovo, a ne pitamo se ni za što. Šta ćemo dobiti, a šta izgubiti?

ALMIR ŠPIODIĆ – vijećnik BPS-Sefer Halilović

Replika kolegi Haskoviću, a iskoristit ću priliku da čestitam kolegi Sinanoviću na repliciranju i na, ne znam, trebali ste uzeti ulogu nekoga ko bi nam obrazložio kao neko ko radi u rudniku i ne bi došlo možda do ovoga.

Kolega Haskoviću, ne možemo mi selektivno, e ove ćemo spasiti ljude jer oni neće dobiti, a ove ćemo žrtvovati, jer su oni već napravili. Znači mi se moramo prema svakom građaninu postaviti jednako. U početku sam rekao da je ova Odluka znatno bolja Odluka od prethodnih i što kaže Sinanović, može se čestitati načelniku na izbornim ovakvim rezultatima vezano za Odluku da se smanji taj prostor, da se izbjegne i Lješevu, širi dio Podlugova i sve je to dobro, ali i ovo sada što nam se nudi nije najbolje. Na kraju krajeva "razvlačimo pamet". Glasajte, imate većinu. Ja neću glasati za ovo da me savjest peče. Glasajte, imate većinu, ne morate izvlačiti replike od mene, nego me uvijek podstaknete da moram replicirati.

ALMA OMEROVIĆ – predsjedavajuća

Kolega Špiodiću, replike su veoma poželjne tako da apsolutno vas niko ne sprječava.

AKIF FAZLIĆ – općinski načelnik

Dakle, ako ne donesemo ovu Odluku, na određeni način ćemo zaustaviti proces koji se vodi u Ministarstvu privrede Kantona Sarajevo. To će onemogućiti i Kanton Sarajevo da ide u ono što se, prije svega, zove rješavanje pitanja koncesionih naknada. Međutim, vraćamo se opet da ljudi imaju Rješenja Federalnog ministarstva za eksploataciju i oni će sigurno i dalje raditi. Šta smo mi time dobili? Nismo dobili ništa.

Što se tiče vijećnika Špiodića, sve lijepo pričamo, ali ako mogu ljudski kazati, i sam konstatuješ koliko je bolja ova Odluka, sam konstatuješ koliko ona donosi benefita i opet će te peći savjest. I mene bi pekla savjest kada bi ja mogao granicu zagradi od općine i reći nema više ovamo i da mi je to izbor, ali nije nam to izbor. Dakle, nemamo tog izbora. Onda bi se i ja kao i ti isto postavio i rekao nema toga. Zato vas opet pozivam, dajte ljudi, ako smo to sve naglas kazali koliko je ova pozicija i situacija bolja u odnosu na onu danas i ako ovo ne donesemo opet ostavljamo onu kakva je ona danas. E u tom izboru ja ne razumijem što bi nekog pekla savjest o što ne bi glasao i podržao ovu Odluku. Na tom fonu dajte da sami sa sobom budemo korektni i odgovorni i da se tako postavimo.

Diskutanata po ovoj tački dnevnog reda više nije bilo, pa je predsjedavajuća dala na

glasanje predmetnu tačku.

Vijećnik Almir Špodić je izrazio sumnju u glasanje i zatražio pojedinačno glasanje.

ZA su glasali sljedeći vijećnici: Anel Bumbulović, Vehid Halilović, Alma Omerović, Mehmed Sinanović, Adem Alić, Fahir Hasanović, Mirza Bektić, Semir Dedić, Halid Dizdarević, Rasim Šehić, Melisa Matoruga, Alen Hasković, Sead Šehić, Edhem Hasanović, Besim Gljiva i Meho Džindo

PROTIV su bili sljedeći vijećnici: Muhamed Handžić i Almir Špodić

UZDRAŽANI su bili sljedeći vijećnici: Eldar Šehić, Mirsad Osmanović i Asim Mujić

ODSUTNI vijećnici: Šeharzada Ćosić, Alan Šerak, Akif Bešlija i Semir Dizdarević

Konstatovano je da je sa 16 glasova ZA, 2 PROTIV i 3 UZDRŽANA, Općinsko vijeće donijelo

Odluku o davanju prethodne saglasnosti za dodjelu koncesije privrednom subjektu JP Elektroprivreda BiH d.d. Sarajevo – Zavisno društvo Rudnik mrkog uglja "Breza" d.o.o. Breza za istraživanje i eksploataciju mineralne sirovine uglja na području općine Ilijaš

#### AD-4

Prijedlog Odluke o novčanim podrškama u poljoprivrednoj proizvodnji na području općine Ilijaš za 2019. godinu

ALMA OMEROVIĆ – predsjedavajuća

Dobili ste amandman na ovaj prijedlog Odluke koji glasi:

U članu 8. u dijelu Animalna proizvodnja, tačka 1. Govedarstvo, dopunjava se sa tačkom c) Uzgoj priplodnih junica

U članu 9. stav 1. tabela prijedloga, se mijenja na način da umjesto predložene tabele Iznosa novčanih podsticaja po jedinici i vrsti ostvarene proizvodnje u dijelu Animalna proizvodnja, ista glasi:

r/b	VRSTA PODRŠKE	Iznos sredstava KM/po jedinici mjere	Norme i limit za podsticaj
Animalna proizvodnja			
a)	Držanje muznih krava	125,00 KM/grlu	3 i više, za isporučioca mlijeka neograničeno, do 10 ako nije u sistemu otkupa mlijeka
b)	Tov junadi	115,00 KM/grlu	Min. 3 – max. 20 grla Max.30 grala za pravna i registrovana fizička lica kao obrt
c)	Vlastiti uzgoj priplodnih junica	115,00 KM/grlu	Min. 2 – max 5 grla

d)	Uzgoj i držanje ovaca	12,00 KM/grlu	Min.40 – max 100 grla
e)	Uzgoj i držanje pčelinjih društava	12,00 KM/košnici	Min. 30 – max 100 košnica

Član 9. stav 2. se dopunjava u dijelu tačke 1. sa podtačkom c), koja glasi:

c. Vlastiti uzgoj priplodnih junica

- minimalno 2, a maksimalno 5 grla

- da je na farmi od vlastitih grla osnovnog stada mliječnih krava na gazdinstvu uzgajao priplodne junice za remont ili proširenje osnovnog stada mliječnih krava

- da uzgoji junice od najmanje četiri mjeseca gravidnosti.

Podrška se ostvaruje u skladu sa uslovima koji su definisani za ovu proizvodnju kroz Pravilnik za ostvarivanje novčanih podrški Kantona Sarajevo (član 14 stav 2. ).

Član 9. stav 2. tačka 2. Podrška za držanje ovaca, mijenja se alineja 1. tako da glasi:

– da posjeduje najmanje 40 ovaca (ovce, ovnovi, jagnjad starija od 4 mjeseca) obilježene u skladu sa Pravilnikom o obaveznom obilježavanju.

Član 12. tačka 1. dopunjava se sa novom alinejom “-Vlastiti uzgoj priplodnih junica”.

SEAD ŠEHIĆ – vijećnik SDA

Postavio bih pitanje za podsticaj što se tiče pčelarstva. Prošle godine je bilo da si morao biti član Udruženja da bi imao podsticaj. Ove godine to ne piše u ovoj Odluci. Interesuje me da li to ostaje isto ili ne moraš biti člana Udruženja.

AKIF FAZLIĆ – općinski načelnik

Moram priznati da ne znam odgovor, ali u prijedlogu Odluke piše podrška za pčelarstvo i onako kako piše tako će se postaviti za svakoga ko aplicira.

Diskutanata po ovoj tački dnevnog reda više nije bilo, pa je Općinsko vijeće, uz predloženi amandman, jednoglasno donijelo

Odluku o novčanim podrškama u poljoprivrednoj proizvodnji na području općine Ilijaš za 2019. godinu

AD-5

Prijedlog Rješenja iz imovinsko-pravne oblasti:

a) rješenje broj:06/1-31-171/14

b) rješenje broj:06/1-31-605/17

c) rješenje broj:06/1-31-955/17

Diskutanata po ovoj tački dnevnog reda nije bilo, pa je Općinsko vijeće većinom glasova donijelo

Rješenja iz imovinsko-pravne oblasti:

a) rješenje broj:06/1-31-171/14

b) rješenje broj:06/1-31-605/17

c) rješenje broj:06/1-31-955/17

## SEAD ŠEHIĆ – vijećnik SDA

### Inicijativa:

Inicijativa od strane Grupe građana iz ul. Hašima Spahića od broja 12 do 20.

Naime, ova grupa građana zamolila je da iznesem njihov problem koji je prisutan već duže vrijeme, a radi se o sanaciji odvodnih kanala (šahtova) u koje se slijevaju oborinske vode.

Obrazloženje: U navedenoj ulici od ukupno deset prihvatnih šahtova samo su dva u funkciji, tako da prilikom malo većih padavina isti nisu u mogućnosti da prihvate oborinske vode, te stoga dolazi do preljevanja oborinskih voda preko ivičnjaka i dolazi do poplave pred ulazima u zgradu kao i u podrumске prostorije. Sve oborinske vode teku ispod zgrade i plave određeni dio poslovnih prostora, a nakon povlačenja vode ostaje velika količina mulja i blata. Tako da je stanarima otežan prilaz zgradi. S tim u vezi, stanari ove ulice da bi riješili ove probleme obraćali su se JKP "Vodostan" Ilijaš, zatim nadležnoj opštinskoj službi. Doduše, na njihov zahtjev 2016. godine radnici Vodostana su samo izvršili pročepljenje navedenih šahtova, međutim, problem nije trajno riješen. Sa istim zahtjevom su se obraćali i 12.07.2017. godine, ali nisu dobili nikakav odgovor, niti je izvršena sanacija navedenih šahtova. Kantonalni inspektor je dana 03.02.2016. godine na licu mjesta izvršio nadzor na pomenutoj lokaciji i konstatovao da su navodi u prijavi tačni, a odnose se na odvodnju oborinskih voda. Utvrdio je da će njihova molba za sanaciju odvodnih šahtova istog dana biti dostavljena JKP "Vodostan" Ilijaš na izvršenje.

Iz gore navedenih razloga, stanari ove zgrade mole i traže da se njihov problem što prije riješi, odnosno da se izvrši potpuna sanacija odvodnih kanala (šahtova). Osim toga, obzirom da u posljednje vrijeme imaju problema oko parking prostora pa su prinuđeni da vozila ostavljaju na trotoarima ili na mjestima gdje je parkiranje zabranjeno, ističu zahtjev da se izmjenama i dopunama Regulacionog plana ovog dijela Ilijaša predvidi i parking prostor.

Također, ova ulica je puna udarnih rupa na asfaltu, a i sam asfalt je dotrajavao i mnogo smeta normalnom odvijanju saobraćaja. Također, ova grupa građana učestvovala je i u javnoj raspravi o ovom našem sadašnjem Budžetu i predlagali su i amandmana koje su uredno dostavili na protokol, ali eto nikad im nisu ni služba ni bilo ko izašao u susret.

Zato vas u njihovo i u svoje ime molim da ovu inicijativu uvažite, a ako ne sada onda za sljedeću Budžetsku godinu i uvrstite u prioritetno izvršenje.

## ALMIR ŠPIODIĆ – vijećnik BPS-Sefer Halilović

Moram reagovati na odgovore koje dobijama na postavljena pitanja i inicijative. Prije nego što pročitam pitanje i inicijative za ovu sjednicu, osvrnut ću se na odgovor koji dobivam na postavljena pitanja od općinskih službi i drugih javnih ustanova i institucija koje vrlo nekorektno, paušalno i krajnje drsko odgovaraju na vijećnička pitanja i inicijative.

Ja moram da reagujem i komentarišem odgovor koji sam dobio od komunalnog inspektora i volio bih da je on danas prisutan na sjednici da čuje šta ću mu reći. Komunalni inspektor u svom odgovoru na postavljeno pitanje djelimično je odgovorio u prvoj rečenici koji je sasvim ok. U drugoj rečenici je samo trebao odgovoriti da li je sa svojim kolegama iz nadležne općinske službe našao rješenje nastalih problema i kada će se riješiti. To je bilo sve i ja bih bio potpuno zadovoljan tim odgovorom, a i građani bi dobili pravu informaciju. Međutim, on sebi daje za pravo da iznosi neistine o meni i upušta se u bespotrebnu

raspravu. Vi inspektore, obraćam se komunalnom inspektor u općini Ilijaš, niste u poziciji da komentarišete moj rad i rad predsjednika mjesnih zajednica, kao što sebi dajete za pravo i da pravite poređenje kanalizacije u Sovrlama i kanalizacije u Docima gdje kažete da je to isti slučaj kao kada ja nisam dao (odnosi se na mene lično) nekome da se priključi na kanalizaciju, što je totalno neistina. Neozbiljno je od jednog komunalnog inspektora da piše jedan takav odgovor. Jedino što je slično u ova dva slučaja jeste, a on je to i naveo, problem kanalizacije na Sovrlama je od 2013. godine (to je šest godina), a problem kanalizacije u Docima je bio 10 godina i ono što je zajedničko u ova dva slučaja je da se po pitanju našeg inspektora to ne bi nikada riješilo. Kanalizaciju u Docima sam riješio ja i javno se zahvaljujem načelniku koji je podržao moju inicijativu, moj prijedlog i riješili smo problem kanalizacije koji je datirao 10 godina. Komunalni inspektor sebi daje za pravo da on to poredi kako ja to nekome negdje nisam dao. Odakle mu pravo da se on upušta u moj lični život jesam li ja dao nekome priključak kanalizacije ili nisam. Ne bavim se ni ja njegovim privatnim životom šta priča po ilijaškim kafanama ili slastičarnoj. To je jedno. Na kraju, on je obavezan da radi svoj posao, jer ga građani za to plaćaju. Plaćaju ga od nameta i poreza koji nisu nimalo mali u ovom vremenu. Ovdje se čak i zrak plaća. Građani za to što plaćaju, očekuju uslugu i od općine, vijećnika, mjesne zajednice itd. Mi smo tu da pružimo uslugu njima.

Vraćam se na inicijativu koju pokrećem po treći put, jer mi ne dostavljate odgovore kako treba. Izbjegavate odgovor.

Ponovo ću pokrenuti inicijativu koju sam pokrenu na 30. sjednici Općinskog vijeća. Izgleda da me niste dobro shvatili kada sam govorio o inicijativi za izgradnju podzemnog prolaza ispod pruge u Podlugovima kod željezničke stanice. Niste shvatili ni kolika je važnost i potreba ove inicijative koju su građani ovjerili sa 150 potpisa. Žao mi je što se opstruira ovakva građanska inicijativa koja je jedino rješenje za višegodišnje probleme građana u Podlugovima koji prolaze sa jedne na drugu stranu željezničke pruge. Inicijativu ću predati pismeno i zamolio bih resornu službu da inicijativu dostavi na adrese koje sam ja naveo. Koristim priliku da kažem da sam u prethodnoj inicijativi pogriješio gdje sam naveo da mi se podaci iz Regulacionog plana dostave od strane Službe za stambeno-komunalne poslove, a koja nije nadležna, ali mogli ste vi to proslijediti službi koja je nadležna da se ja ne moram ponovo ovdje obraćati. Vi nećete da proslijedite, nego da samo prolongirate. Mogli ste vi to proslijediti na pravu adresu.

Inicijativa:

Pokrećem inicijativu ispred grupe građana MZ Podlugovi ulice Polomska, Žrtava genocida u Srebrenici, Moševačke, naselja Vratuša, Makljen, naselje Obala, Sovrle I i Sovrle II za izgradnju podzemnog prolaza za pješake ispod željezničke pruge od željezničke stanice u Podlugovima do ul. Žrtava genocida u Srebrenici.

Obrazloženje: Podsjećam Vas da je grupa građana MZ Podlugovi – ulica Polomska, Žrtava genocida u Srebrenici, Moševačke, naselja Vratuša, Makljen, naselje Obala, Sovrle I i Sovrle II od dana 11.04.2019. godine do 15.04.2019. godine, nakon nesretnog slučaja smrti učenika SŠC "Nedžad Ibrišimović" u Ilijašu, Ramić Belmina, koji je smrtno stradao na jednom od parkiranih vagona na Željezničkoj stanici u Podlugovima odlučila da pokrene inicijativu za izgradnju podzemnog prolaza za pješake ispod željezničke pruge u Podlugovima, sa ulice Žrtava genocida u Srebrenici prema autobuskoj stanici Podlugovi.

Tokom prikupljanja potpisa za pokretanje inicijative za izgradnju podzemnog prolaza ispod željezničke pruge, građani su izrazili visok stepen nezadovoljstva i straha kako za sebe tako i za svoju djecu oko prelaska željezničke pruge u Podlugovima.

Radi lakšeg razumijevanja ovog problema, želimo napomenuti da oko 3000 građana MZ

Podlugovi, odnosno ovih ulica i naselja, najmanje dva puta u jednom danu prelazi prugu u oba smjera tj. iz ulice Žrtava ganocida u Srebrenici prema autobuskoj stanici i obrnuto. Prilikom prelaska skoro svakog dana na jednom ili dva željeznička kolosjeka stalno je parkirano više od 25 teretnih vagona, oko 15 vagona zatvorenih cisterni sa gorivom, te svakodnevno u oba smjera prolaze vozovi u redvonom režimu saobraćaja. Zbog duge kolone parkiranih vagona i cisterni, građani ovih ulica i naselja prinuđeni su prelaziti preko platformi vagona ili se provlačiti ispod vagona koji su parkirani na željezničkoj stanici. Zbog nepostojanja obezbjeđenog prolaza u dužini od cca 50 m ispod ili iznad pruge, građani su primorani da se izlažu riziku kretanja preko željezničkih kolosjeka ili da pješake 3-5 kilometara kako bi došli do ambulante, autobuske stanice, tržnih centara itd. sa jedne strane željezničke pruge i do OŠ "Podlugovi" sa druge strane pruge. Kada građani i djeca prelaze vagone ili se provlače ispod, istim nije siguran prolaz zbog pomicanja tih kompozicija u momentu prelaska, kao i to da te parkirane cisterne, koje su uvijek bez nadzora radnika Željezničke stanice, mogu biti trenutna opasnost kako zbog goriva koje je u njima, tako i zbog električne energije, tj. visokog strujnog napona, koji je u gore pomenutom slučaju izazvao gubljenje/smrť jednog mladog života.

Pored gore navedenog, želimo naglasiti da učenici OŠ "Podlugovi" iz MZ Ljubnići i Lješevo takođe koriste obostrani prelazak preko željezničke pruge, tako da se i oni susreću sa ovim problemima prilikom dolaska i odlaska iz škole. Svim građanim i učenicima koji koriste javni prevoz iz Podlugova u pravcu Ilijaša i Sarajeva, takođe je otežan dolazak na autobusku stanicu Podlugovi, kao i odlazak u Ambulantu Podlugovi, te u prodavnice, ogrjev, apoteke i druge objekte koji se nalaze u ulici Moševačka. Dana 15.04.2019. godine u 18:30 h, u prostorijama JU OŠ "Podlugovi" održan je sastanak Vijeća roditelja koji su takođe svojim potpisima podržali ovu inicijativu za izgradnju podzemnog prolaza za pješake ispod željezničke pruge u Podlugovima.

U ranijem periodu Vijeća roditelja OŠ "Podlugovi" je upozoravalo na ovaj problem nadležne u općini Ilijaš, PU Ilijaš i menadžment Željeznica F BiH, ali se do sada, iz nama nepoznatih razloga, nije našlo adekvatno rješenje za ovaj problem, tj. problem prelaska građana i djece preko željezničke pruge.

Na kraju ove inicijative želimo najiskrenije zamoliti, kolegij Općinskog vijeća Ilijaš da u konsultaciji sa općinskim načelnikom i općinskim službama ovu inicijativu preimenuju u Zaključak i dostave ga na narednoj sjednici u materijalima na usvajanje, shodno Poslovniku Općinskog vijeća koji glasi:

Da se odmah pokrene zakonska procedura rješavanja podzemnog prolaza za pješake ispod željezničke pruge u Podlugovima, a to podrazumjeva izmjene i dopune Regulacionog plana Podlugovi I ako istim nije predviđen prolaz ispod pruge na pomenutoj lokaciji, pribavljanje određenih saglasnosti, izrada projekta itd.

Također, tražim od nadležne općinske službe da ovu inicijativu, sa prikupljenim potpisima, uputi na sve relevantne adrese, odnosno institucije koje bi mogle pomoći rješavanju ovog problema:

1. Vlada Federacije BiH,
2. Federalnom ministarstvu prometa i komunikacija,
3. Ministarstvu prostornog uređenja Kantona Sarajevo,
4. Ministarstvu saobraćaja Kantona Sarajevo,
5. Direkciji za ceste Kantona Sarajevo,
6. Vladi i Skupštini Kantona Sarajevo
7. Općinska Služba prostornog uređenja i zaštitu okoliša
8. Drugim institucijama koje bi mogle finansijski pomoći u izgradnji ovog podzemnog

prolaza, jer građani MZ Podlugovi znaju da općina Ilijaš možda trenutno nije u mogućnosti sama finansirati izgradnju podzmenog prolaza ispod željezničke pruge.

U prilogu dostavljam potpise građana MZ Podlugovi.

Pitanje:

Kada će biti podjela kanti za selektivno odlaganje otpada u MZ Podlugovi?

Podjela kanti za selektivno odlaganje otpada počelo je još 2017. godine u 8. mjesecu i krenulo se redom od Lješeva, Ljubnića, pa su se preskočili Podlugovi, podijeljene su u Misoči, a onda u maju 2019. godine podijeljene su u naselju Kamenica i ul.Bosanski put.

Ima li neki redoslijed po prioritetima i kriterijima ili se vrši podjela na osnovu nekog drugog lobija i ko uopće određuje gdje će se vršiti podjela?

Ovaj projekat sa kantama je odličan i za svaku pohvalu, samo vas molim da ne budu Podlugovi zadnji koji će dobiti ove kante, jer mi već sad imamo problema da ljudi kabasti otpad dovlače u Podlugove i ostavljaju pored kontejnera.

ALEN HASKOVIĆ – zamjenik predsjedavajućeg

Samo informacije radi, Stručna služba općinskog vijeća i općinskog načelnika sva naša pitanja i inicijative dostavlja svim općinskim službama, bez obzira da li se naša inicijativa odnosi na neku službu ili ne odnosi. Znači, sigurno je da sva naša pitanja i inicijative dobiju sve općinske službe.

ELDAR ŠEHIĆ – vijećnik SDP-a

Čestitam Almiru Špiodiću, jer on stvarno iznosi sve ono što treba i što nije uredu.

Na sjednici Vijeća od 18.04.2019.godina imao sam dva pitanja i inicijativu. Od ta dva pitanja na jedno mi je odgovoreno, samo mi je ponovljeno pitanje i bukvalno je ponovljeno kao odgovor. Ja sam pitao zašto linije koje su ocrtane prema Popovićima u februaru nisu se zadržale duže od dvadeset dana. Meni je odgovoreno da su linije ocrtane u februaru i da su za to zadužene Auto-ceste, a ja od opštine tražim, ukoliko su u mogućnosti, utiču na izvođače radova da rade onako kako bi se trebalo raditi. Sada do Popovića nema niti jedne linije, pješačkog prelaza, trotoara, a znate koliko ima pješaka koji prolaze tim putem. Uglavnom na moje pitanje sam dobio moje pitanje prepisano u potvrdnoj rečenici, ne u upitnoj.

Pitanje:

Drugo pitanje je bilo vezano za sanaciju puteva koje oštete izvođači radova na apartmanskim naseljima. Ja sam čekao dvije sjednice, obzirom da sam mislio da treba malo više vremena da se odgovori na to pitanje, ali odgovor nisam dobio, tako da želim to pitanje ponovo postaviti onako kako sam postavio 18.04.2019. godine.

Znači, da se odgovori ko je zadužen za sanaciju štete na javnim dobrima – putevima koju prouzrokuju izvođači radova na apartmanskim naseljima i ako je moguće, putevi koji su manje nosivosti da se stave znakovi i sva ostala ograničenja koja će smanjiti propadanje tih puteva.

Svjesni smo da općina finansira dio puteva koji se prave, ali isto tako smo svjesni da građani plaćaju svoje puteve i sudjeluju zajedno sa općinom u istima tako da mislim da građani moraju da znaju ko im uništava puteve i ko će biti nadležan da popravi iste.



## MUHAMED HANDŽIĆ – vijećnik BPS-Sefer Halilović

Ja moram napomenuti da na jedno od mojih prethodnih pitanja koje sam postavljao na prethodne tri sjednice nisam dobio adekvatan odgovor. Nisam dobio takoreći nikakav odgovor, a očekivao sam da dobijem odgovor od komunalnog inspektora kako je već Almir naveo. Dakle, tražio sam da mi dostavi Izvještaj sa nadzora o stajnjacima koji su uzrok širenja neugodnog mirisa u Ilijašu i naseljima oko Ilijaša. Lik se dosjetio da mi da odgovor da to nije njegova nadležnost i napisao je da u ovom slučaju ja nemam pravo ni da tražim Izvještaj niti da uputim Zahtjev za inspekcijski pregled ovim uzročnicima. On je napisao da to ima pravo Vlada KS, kantonalno resorno ministarstvo, Direkcija kantonalne uprave za nadzor i inspekciju i pravna i fizička lica. U ovom slučaju ja sam vijećnik, pa ne znam kako on mene tretira. Sigurno nisam pravno, ali jesam fizičko lice. Međutim, on me nije tretirao ni tako. Tako da mi nije dostavio odgovor i napisao je da on meni ne može dati razuman odgovor. Zamislite to. Ne može mi dati razuman odgovor, jer on pod uticajem već čega, nas dvojica se ne razumijemo. E ja očekujem da mi da razuman odgovor još slijedeću sjednicu Vijeća i ja ću nastojati da napišem prijavu Inspekciji za javnu upravu i da oni prekontrolišu šta je njegova nadležnost i nadležnost Službi u općini Ilijaš. Ako misli da one meni ne treba dostaviti taj Izvještaj, onda ja griješim i ja se njemu izvinjavam, a mislim da smo mi zakonodavni organ u općini Ilijaš i da traženo od izvršnog organa trebamo dobiti. Gospodin mene ignoriše i piše da nema razuman odgovor za širenje neugodnog mirisa u Ilijašu.

## MIRZA BEKTIĆ – vijećnik SDA

Inicijativa:

Podnosim inicijativu prema JKP "Rad" Sarajevo da na lokalitetu naselja Gornji Kadarići postave dva kontejnera, a u donjem dijelu Kadarića na potezu od mjesnog doma prema Ljubničima postave jedan kontejner.

Obrazloženje: U svakodnevnim razgovorima sa građanima Kadarića u pomenutim dijelovima naselja brojni građani izrazili su nezadovoljstvo sa rasporedom kontejnera, gdje se neki nalaze i do kilometar od ovih dijelova naselja.

## ŠEHERZADA ĆOSIĆ – vijećnica SDA

Pitanje:

U kojoj je fazi rješavanje "oštre krivine" na glavnom putu u naselju Mrakovo?

Obrazloženje: Već nekoliko puta gore navedeno pitanje je predmet opservacije organa savjeta MZ Mrakvo kao i nadležnih službi u organu uprave općine Ilijaš. Po našim saznanjima projekat za navedeni predmet postoji, što nije smetnja za daljnje procedure. Također je proglašen opći javni interes na navedenom putu što bi trebalo olakšati proceduru.

Molimo nadležne službe da pripreme Prijedlog rješenja iz imovinsko-pravne oblasti za narednu sjednicu Općinskog vijeća Ilijaš.

Inicijativa:

Da općinski načelnik putem nadležne službe uputi zahtjev Kantonu Sarajevo, Ministarstvu saobraćaja tj. Direkciji za puteve Kantona Sarajevo vezano za odvodnju površinskih/atmosferskih voda na glavnom putu u naseljima Popovići i Salkanov Han.

Obrazloženje: Više puta smo obavještavali i isticali problem odvodnje površinskih/atmosferskih voda u naselju Popovići i Salkanov Han. Posebno u dijelu trase puta kod mesdžida u Popovićima i kuća Omerhodžić Šerifa i Spahić Salke u Salkanovom Hanu.

Nakon što je iscrpljen dnevni red, predsjedavajuća Alma Omerović zaključila je tridesetdrugu sjednicu OV-a Ilijaš u 12:40 h.

Zapisničar:  
Maida Habibović

PREDSJEDAVAJUĆA  
OPĆINSKOG VIJEĆA ILIJAŠ

---

Alma Omerović, BA nov.

\*\*\*\*\*

Ul. 126. ilijaške brigade br. 6, 71380 Ilijaš  
Tel. ++387 33 580-620, 580-698, fax. 400-505,  
Transakcijski račun kod VAKUFSKE BANKE,d.d. Sarajevo:1602000000710645  
e-mail [ov@ilijas.ba](mailto:ov@ilijas.ba)  
certifikat:CRO20063Q

